

من بعد ظهور نتيجة المرحلة النهائية هيبداً كل فرد إنه يلف دورة روتينية علشان يخلص ورقه، الفايل ده بيشرح الإجراءات
إللي دفعة كهربا 2022 مرت بيها

(الإخلاءات -> سحب الملف -> طلب شهادات التخرج -> الجيش -> تجهيز ورق النقابة -> تسجيل النقابة -> خدمات
النقابة -> تجديد البطاقة -> شهادات الثبوتية -> ...)

الإخلاءات

في 5 إخلاءات بيطلعوا

(1 مكتبة الكلية

دي أسهل وأسرع واحدة، بتروح المكتبة إللي في مبنى 9، هتطلب إخلاء المكتبة (كان ب2 جنيه ساعتها) هتيدها الفلوس
هتديك ورقة خضرا صغيرة كدة

(2 المكتبة المركزية

هتخش على اللينك ده وتكتب ال username وال password دول (الكلام ده لدفعة 2022 بالنسبة للسنين الجاية
هتروح المكتبة المركزية إللي جوا جامعة القاهرة وهتلاقي ورقة متعلقة فيها username و password)

<https://ckes.cu.edu.eg/Default.aspx>

Username: clib

Password: cl!b\$#@

وبعدها تدخل وتدوس على لوجو الجامعة، هيطلب منك بياناتك (اسم، رقم قومي، إيميل، موبايل) وهتختار الفئة "المكتبة
المركزية الجديدة" والخدمة "إخلاء الطرف للطلبة"

بعد كدة تدوس فوري، وتختار إنك هتدفع عن طريق فوري (ب32.5 جنيه)

هيطلعك كود هتروح أي حد بتاع فوري تدفع عنده

لو إنت هتدفع فوري من أي حته "وده الأفضل" يبقى هتروح المكتبة المركزية تقولهم إن معاك الوصل وعاوز تختمه بس
وهما هيدخلوك على طول

إنما لو قررت تدفع في الجامعة يبقى ربنا يعينك على الطابور الطويل إللي هتقف فيه علشان تخش المكتبة وتدفع جوا (في
العادي المفروض تدفع جوا المكتبة، بس علشان الزحمة فهما سامحين إنك تدفع برا عادي)

(3 إدارة التدريب

هتروح إدارة التدريب إللي جمب حمام السباحة في الكلية، هات معاك كل الشهادات بتاعت التدريبات أو الكورسات إللي
أخذتها "سواء أونلاين أو أوفلاين"، المفروض يكون معاك على الأقل شهرين تدريب (شهر خلال سنة أولى وثانية، وشهر
خلال سنة ثالثة ورابعة) بس هما ساعات بيواصلوا في التواريخ "تدريب 20 يوم يقولك ده اسبوعين بس مش 3" علشان
كدة هات كله أفضل

المفروض يبقى معاك أصل الشهادات "بيطلعوا عليها بس مش هياخدوها" ومن كل شهادة نسختين، ومن هناك بتجيب
ورقة صغيرة بتكتب فيها بياناتك (الاسم، القسم)

هتخش تديهم صور الشهادات، هما هياخدوا نسخة، والنسخة التانية هيدبسوها ويختموها ويدوهالك

(4 التربية العسكرية (للشباب بس)

هتجهز معاك (صورة بطاقة، صورة كارنيه، صورة شخصية)

ولو إنت اخدتها أونلاين يبقى تطبع الاستمارة "خش على الموقع إللي اخدت التربية العسكرية منه هتلاقيها"
أما لو كنت أوفلاين مش هتحتاجها، بس حاول تعرف المعاد إللي اخدت فيه التربية العسكرية علشان متتكدش قدام الشباك
هتروح المدينة الجامعية "قدام باب تجارة من برا الجامعة لو محدش يعرف مكانها" هتسأل على التربية العسكرية ولما
توصل هتلاقي ناس بتلم البطايق ويبسملوها لموظفة الشباك وهي بتنده اسم اسم
لازم تروحوا بدري لأن بعد الساعة 12 بنسبة كبيرة مش هياخدوا بطايق ثاني

(5) المدينة الجامعية (إللي كانوا ساكنين في المدينة الجامعية بس)

معرفش عنه حاجه الصراحة

بس موظف شؤون الطلبة كان ببسأل عليه، فلو مش معاك هيسألك إنت ساكن فين

سحب الملف

كدة الإخلاءات خلصت، فاضل بس قبل ما تروح شؤون الطلبة تعمل 3 حاجات

(1) رسوم سحب الملف

هتخش على اللينك ده، تخش على شؤون الخريجين وتختار الخدمة "رسم سحب ملف (خريجين)"

<https://ckes.cu.edu.eg/foe.aspx>

هتدخل بياناتك زي ما عملت في المكتبة المركزية وتختار فوري علشان تدفع 52.5 جنيه

(2) رسوم طلب الإفادة (لو هتقدم في الجيش دفعة أولى، أو لو جالك وظيفة، أو لو هتجدد البطاقة)

نفس اللينك بتاع "سحب الملف" بس هتخش على شؤون الطلبة وتختار الخدمة "طلب إفادة (بكالوريوس)"

ضروري ضروري تختار عدد الشهادات 2 لو عاوز شهادة واحدة، لأن سعر الشهادة الواحدة أصلا ب 100 مش 50
(الحوار ده حصل في دفعة 2022 بسبب غلطة في السيستم كان سعر الشهادة مكتوب غلط، إنما في السنين الجاية ممكن
يعدلوها)

قبل ما تروح عند شباك شؤون الطلبة (قبل ما تدفع فوري أو بعدها مش مهم) هتخش على موقع الكلية إللي بنجيب منه
النتيجة ده، هتدوس على "تقديم طلب" وتختار نوع الطلب "إفادة تخرج" بعدها تدوس "حفظ"

<https://std.eng.cu.edu.eg/>

الإفادة دي ورقة كدة بتطلع بسرعة لو إنت مستعجل، لو مش مستعجل ممكن تستنى لحد أما بياناتك تتسجل في سيستم الكلية
وبعدها تطلع بيان النجاح أفضل، وحتى بيان النجاح ممكن متطلعوهش وتستنى شهادة التخرج أفضل (الموضوع بيعتمد
على مدى استعجالك)

(3) مظروف خريج جديد

تروح للشباك إللي جمب البنك الأهلي، هتديها 15 جنيه هتديك ظرف فيه 3 ورقات كبار وورقة صغيرة

هتلمى الورق ده وتخط معاه الإخلاءات وكود فوري بتاع سحب الملف وتروح على شباك شؤون الطلبة بتاع قسم كهرباء
(أو أيا كان القسم بتاعك)

الرجل هيديك كشف تمضي فيه إنك استلمت الملف وورقة كدة تمضي فيها إنك استلمت 6 جند (بتاعت الجيش دي) وبعدها هيسلمك الملف بتاعك (فيه شهادة الميلاد وشهادة الثانوية العامة "وشهادة 6 جند للشباب") وهيديك المظروف أبو 15 جنيه تاني بعد ما مضالك عليه علشان هتحتاجه بعدين

لو إنت طلبت "طلب الإفادة" هيقولك استنى ساعتين، ولما تاخدها منه هتخش شؤون الطلبة جوا علشان تختمها

شهادات التخرج

بالنسبة بقى لشهادات التخرج لما يتم الإعلان عن نزولها

مظروف التخرج إللي جنباه ساعة سحب الملف، كان فيه 3 ورقات كبار:

ورقة بتاعت بيان النجاح وورقة بتاعت شهادة الثبوتية، دول ملناش دعوة بيهم، إحنا هحتاج الورقة الثالثة بس (بيان النجاح ده مهم للي داخلين الجيش دفعة أولى علشان بيطلع بسرعة، وشهادة الثبوتية مبتطلعش دلوقتي أصلا "مش قبل شهر 1 كدة"، دي أمن الدولة إللي بتطلعها لك فيها كل بياناتك وعليها علامة مائية علشان متنزورش)

لما تقدم على الشهادة، لو ليك مرتبة شرف ونسيت تكتبها متقلفش هما هيكتبوها لك في الشهادة (مرتبة الشرف بتاخذها لما ال4 سنين تجيب فيهم نفس التقدير "امتياز أو جيد جدا" وتكون خلال ال4 سنين عمرك ما جبت أقل من مقبول في أي مادة)

الورقة الثالثة بتاعت شهادة التخرج، هتملاه وتديه لموظفة شباك شؤون الطلبة (للقسم بتاعك) علشان تمضي عليه، وهنديها كارنيه سنة رابعة وتديها صورتين شخصيتين (لأن أقصى عدد شهادات بيطلع هو شهادتين عربي)، بعد أما تمضي الصور تاخدها وتخش شؤون الطلبة من جوا علشان تتختم

بالنسبة للرسوم، هتخش على اللينك بتاع فوري علشان تطلع كود الدفع

<https://ckes.cu.edu.eg/foe.aspx>

هتخش على شؤون الخريجين تختار شهادات التخرج وتحط بياناتك وتختار عدد الشهادات 2 بـ 156 (لو طلبت أكثر من شهادتين هتستلم شهادتين فقط وهيتكتبك على الوصل إن ليك شهادة تخرج إنجليزي لما تبقى تطلع)

بعد ما ختمت الصور ودفعت فوري، هتروح تصور وصل فوري وتصور البطاقة وبعدها تروح شباك شؤون الخريجين

هناك هتسلمها ورقة شهادة التخرج وأصل وصل فوري وصورة منه وصورة البطاقة والصور الشخصية المختومة الموظفة هتراجع بياناتك وبعدها تكتبك تاريخ الاستلام على صورة وصل فوري وتديهولك (الاستلام بيكون بصورة الوصل، وبيكون بعد أسبوعين من تاريخ التقديم، وممكن أي حد ياخذ صورة الوصل ويستلم الشهادة مكانك عادي) بالنسبة لشهادتين التخرج، واحدة منهم مختومة بختمين ومكتوب عليها (اعتمدت النتيجة من مجلس النتيجة بتاريخ) الشهادة دي هي إللي الجيش بيطلبها، فاللي عنده جيش يحافظ عليها وميسلمهاش في حته

تجهيز أوراق النقابة

بالنسبة لتسجيل النقابة، الموضوع هيتأخر شوية، لأن الكلية المفروض تبعت كشف بيانات الخريجين للنقابة علشان النقابة تسجلك، حاليا الكلية بتجهز الكشف ده

الأوراق المطلوبة لتسجيل النقابة (أصل شهادة التخرج، بطاقة رقم قومي سارية، صورة بطاقة على ورقة A4، صورة شخصية، صحيفة حالة جنائية "فيش وتشبيه" موجه إلى "نقابة المهندسين")

رسوم حديثي التخرج من الجامعات الحكومية 1145 جنيه + 10 جنيه دمغة هندسية

بالنسبة للفيش ده بيطلع من القسم، بتروح القسم من بدري "الساعة 9 مثلا" ومعك البطاقة ومعك 70 جنيه بتخش تبصم على الجهاز وتتصور وتذكر المكان إللي الفيش موجه ليه، وبتيجي تستلمه ثاني يوم، بس خد بالك إن الفيش صلاحيته 3 أشهر، علشان كدة محدش يقدم على الفيش غير لما يتأكد إن التقديم بدأ، ده غير إن الفيش بيكون موجه لجهة محددة فمينفعش يتقدم في مكان ثاني

تسجيل النقابة

النقابة موجودة في شارع رمسيس جنب مترو أحمد عرابي بالظبط (النقابة بتشتغل من يوم السبت ليوم الأربعاء من 9 ص حتى 7:30 م)، هتروح النقابة معاك ورقك وتنزل الدور الأرضي تاخد رقم وتأخذ استمارة تملئ بياناتك، وهتروح على شباك 2 الأول تجيب طابع دمغة ب 10 جنيه

هتملئ بياناتك وتستنى رقمك، ولما رقمك يجي هتقدم الاستمارة الدمغة، وتقدم معاهم الفيش وشهادة التخرج وصورة البطاقة والصورة الشخصية

الراجل هيطلب منك البطاقة هيتأكد من بياناتك ويديهاك ثاني ويطالب منك تنتظر شوية

لما يندهوا عليك هتروح تدفع 1145 جنيه وتأخذ وصلين، الأول (725 جنيه) تروح بيه شباك 4 علشان تستلم كارنيه النقابة والثاني (420 جنيه) تروح بيه غرفة 25 علشان تستلم كارنيه الرعاية الصحية وكوبونات الرعاية "وتقدر تدخل على موقع النقابة علشان تجيب دليل الرعاية"

<http://eea.org.eg/PageDetails.aspx?ID=27>

بالنسبة لتجديد اشتراك النقابة، إنت تقدر تجدها من النقابات الفرعية أو من النوادي، ولما تيجي تجدد تقدر تجدد اشتراك النقابة لوحده والرعاية الصحية لوحدها (يعني ممكن متجددش الرعاية الصحية لو حابب)

بالنسبة لكوبونات الرعاية، الكوبونات دي بتأخذ بيها خصومات لما تروح تتعالج عند دكاترة متعاقدة مع النقابة (في برامج على بلاي ستور تقدر تبص عليها لو مش عارف تتعامل مع دليل الرعاية إللي على موقع النقابة) بس الكوبونات دي صالحة لمدة سنة بس، بعد كدة بترميها لأن ملهاش لازمة (زمان كنت بترجع إللي متبقي معاك وتأخذ 25% من قيمتهم، بس الموضوع ده اتلغى من مدة)

خدمات النقابة

النقابة بتقدم مجموعة من الخدمات زي المعاشات والتأمين الصحي وصندوق التكافل الاجتماعي والنوادي والإسكان والرحلات والدورات التدريبية، وتقدر تتابع أخبار النقابة على الموقع بتاعهم

في الدور الخامس في النقابة تقدر تسأل على رحلات النقابة العامة (النقابات الفرعية بتطلع رحلات خاصة بيها والنقابة العامة بتطلع رحلات برضو خاصة بيها) تقدر تتابع الرحلات على صفحات الفيس بتاعت فروع النقابة

<https://web.facebook.com/Eea.Travel>

في الدور الخامس برضو تقدر تسأل على مشاريع الإسكان، وتقدر تتابع الإسكان من على موقع النقابة

<http://eea.org.eg/>

في الدور الأخير هتلاقى معمل شنايدر بيقدم كورسات Distribution وKNX (والدور إللي تحته هيتم افتتاح معمل سيمنز)

<https://web.facebook.com/EngSchniedreLab>

حوالين مبنى النقابة العامة في 3 أماكن ممكن تروحلهم

الأول: صندوق التكافل الاجتماعي، روح خد الكراسة التوضيحية لو حابب تقدم فيها (على حسب سنك والشريحة إللي حابب تقدم فيها، هيكون في مبلغ سنوي بتدفعه ولما تتم 60 سنة هتسترد مابين 150% إلى 350% من قيمة المبلغ إللي فضلت تحوشه طول السنين دي)

<https://engtakaful.weebly.com/>

الثاني: النقابة الفرعية بالقاهرة، تقدر تعمل فيها نفس إللي بتعمله في النقابة العامة من تجديد الاشتراكات وخلافه (ماعدًا التقديم في النقابة لأول مرة، ده لازم يتم في النقابة العامة)، غير كدة نقابة القاهرة بتطلع رحلات هي كمان

الثالث: جمعية المهندسين المصرية: دي بتقدم دورات تدريبية وبيتم فيها عقد ندوات ومؤتمرات

تجديد البطاقة

بالنسبة لتجديد البطاقة في 4 احتمالات

الأول إن بطاقتك تنتهي قبل ما الدراسة تخلص (قبل مناقشة مشروع التخرج)، ساعتها تقدر تكتب في البطاقة "طالب بكلية الهندسة" وتأخذ ورق البطاقة للكلية تختمها لك

الثاني إن بطاقتك تخلص بعد الدراسة وقبل ما تسجل في النقابة، ساعتها هتحتاج حاجة من 3 (طلب الإفادة – بيان النجاح – شهادة التخرج) علشان تعرف تجدد البطاقة وتكتب فيها "حاصل على بكالوريوس هندسة"

الثالث إنك تكون مسجل في النقابة (ممكن تأخذ معاك ورق البطاقة في اليوم إللي رايح فيه تسجل في النقابة)، هتأخذ معاك 35 جنيه زيادة وهدفعهم في الخزنة (لو لسة بتسجل في النقابة قول لموظف الخزنة وإنت بتدفع ال 1145 علشان يزود عليهم ال 35 مرة واحدة)، ساعتها هتقدر تكتب في البطاقة "مهندس"

الرابع إنك تكون بتشتغل، اسأل بقى في جهة العمل بتاعتك على حوار البطاقة ده

ملحوظة مهمة، لو عدى عليك 3 شهور من بعد ما اتخرجت ومروحتش تجدد بطاقتك، هتدفع 50 جنيه غرامة